

“Suendoenghduz” Iqet

上林县大丰镇皇周小学四年级 Banz Yezfungh/潘烨锋



Ranz gou lumj aen suendoenghduz iqet ndeu. Baihndaw miz “dúzvaiz” daxboh gaenxguh youh naengzganq, miz daxmeh gaenxguh lumj duzrwi nei, miz dahnuengx lumj duzmanez ganvad nei, lij miz “dúzlingz” cabheiq——gou. Lajneix, gou daiq daihgya daeuj yawjyawj “aensuendoenghduz” ranz

gou.

Gangj daengz daxboh gou, vunz ndaw mbanj mbouj miz vunz mbouj iet fwngzmeh haenh de dwg boux gaenxguh ndeu. Mboujloek, daxboh gou gaenx lumj duzvaiz nei. Miz seiz, dou gwn ngaiz lo, hoeng daxboh lij youq ndaw reih dwk raemx coq byaek, gyoengqvunz banringz yietnaiq, de youq laj daengngoengz cae naz ciemz nywj; doengxhaemh de lij saeqsim dajleix miuz godumh. Gou cam daxboh: “Daxboh, mwngz baenz ngoenz guhhong, mwngz baeg lwi?” Daxboh han gou: “Baeg, cijaeu soucingz ndei, sou ndaej gvaq saedceij ndei, baenzlawz baeg cungj dij.” Gou dingq le ndawsim gig gamjdoengh. Neix couh dwg “dúzvaiz” daxboh gaenxguh youh naengzganq.

Daxmeh gou gaenxguh lumj duzrwi, baenzngoengz nyaengq mbouj dingz. Seiz sou makdumh, daxmeh nyaengq mbaet makdumh fwngz mbouj dingz, mbaet daengz lauxbanj gangj mbouj aeu lo cij dingz fwngz. Daxmeh gangj, mbaet lai gai lai ndaej ngaenz lai. Ranz gou mboujdan ndaem makdumh, vanlij ndaem lwgmanh, haeuxyangz. Seiz sou lwgmanh, daxmeh hwnqromh ninzhwnz sou lwgmanh bae gai. Mwh sou haeuxyangz bae gai, daj gyanghaet

caet diemj cung bae haw gai daengz gyanghaemh caet diemj cung, gai mbouj liux mbouj maranz. Daxmeh lumj duzrwi nei, vih ndaw ranz gwndaenj vandiemz gaenxgyaek sinhoj guhhong.

Gangj daengz dahnuengx gou, gou roxnyinh de lumj duz manez nei, ngahgwn youh ganvad. Miz baez ndeu, gou cawx ma song bau saejdaeuz iq, gou gwn bau ndeu, cuengq bau ndeu youq ndaw doengjgvi, swnh gou mbouj haeujsim, de yaengyaeng byaij gvaqdaeuj, caeg bau saejdaeuz gou, mwh gou fatyienh, de lij caegriu dem.

Gangj daengz gou, gou lumj duzlingz nei, miz di cabheiq. Miz baez ndeu, gou bae Suenva Sanhgih guhcaemz, gou lumj duzlingz nei angq ndaej diuq hwnj diuq roengz, mbouj dingz faen cung ndeu, hanh lae hanh roenx. Lij miz baez ndeu, gou caeuq doengzdoh doxdax benz hwnj gwnz aen danhgang bae, yawj bouxlawz benz ndaej ceiq vaiq, gou din fwngz riengjret, yaepda couh benz hwnj gwnzdingj bae lo, gou ndaej hingz lo. Haha, gou miz di cabheiq, hix miz di dwggyaez ba.

Neix couh dwg “suendoenghduz” iqet ranz gou, saedceij dou gvaq ndaej angqyangz youh vuenyungz.

(bouxlauxsae son 'gyauq Vangz Gveiyangh)

Bo Iq Heuyauyau

Moix boux vunz seiziq cungj miz dieg guhcaemz angqfaengz nanzlumz ndeu, dieg guhcaemz gou dwg aen bo iq ndeu.

Aen bo iq neix depgyawj goengq bya ndeu, goengqbya miz song bak lai mij sang, bo iq caeuq de doxbeij couh daemq lai lo, ceiq lai miz cib lai mij sang ba. Cingq aenvih de daemq, mbouj lingq, gou boux iq neix couh ndaej soengse baedauq hwnjroengz gwnz bo.

Seizcin, bo iq daegbied nauhyied. Nywj heuyauyau, sawj vunz simcingz sangjswt, va ndingraiz gyaunde, sawj vunz angqyangz, duzroeg gwnz faex hemq cici caca, ndei dingq dangqmaz. Bo iq mbe ok aenrunj ceiq cwxcaih de, go-nywj heuyau oiqup lumj denzdemh nei unqnem, yaeng' yaeng lumh dwk gou. Gou youq baihgwnz raih ha, ringx ha, baeg le, couh ninz gwnzde, cwxcaih lai lo.

Seizhah, gou ciengzseiz youq laj gofaex yietliengz, laj raemhfaex, gou youq gumz namh he humx gien rin he, caep baenz aensaeuq, baek hwnj nyefaex hung, caiq caeuq gyoengqdoih youq gwnz saeuq dap nyefaex iq, bae mbaet di mbawfaex caeuq makheu iq cuengq youq gwnz nyefaex. Vunzhung lohgyaq, couh dingz roengzdaeuj, gig mizyinx yawj yaep ndeu, yienzhaeuh cam: “Sou guh gijmaz ha?”

“Coemhfeiz cawj doxgaiq gwn.”

“Gwn gijmaz?” Vunzhung daengdaengq doeksat cam.

“Gwn byaek caeuq mak!” Gou gaemdawz mbawfaex caeuq makheu iq, gyajcang feihdauh raixcaix gwn dwk.

Vunzhung yawj le, riuhaha byaij bae lo.

Seizcou, bo iq rieg “buh” lo. Nywj heu ciemhciemh bienq henj, daengx bo



cungj dwg mbawloenq. Ceiq yinx gou haenx dwg goraue, mbaw de ndingraiz ndei yawj raixcaix, saedcaih sawj gou dawzyinx.

Seizdoeng, bo iq saekseiz miz naehau bu rim. Seizde, gou itdingh buet hwnj dingjbo bae, swnh bolingq ringx giuznae roengz bo, giuznae yied ringx yied hung, caiq dawz aen hung ndeu caeuq aen iq ndeu doxdab, gya di mbawfaex, rin iq, nyefaex, boux vunz nae he couh ndwn youq gwnz bo iq neix lo.

Gou riengz bohmeuh youz gvaq haujlai bya mizmingz, dat sang, faex baenz ndoeng, fwj heux, raemxduqdat…… Bya sang hunghwd, vunz cungj haenhndei. Hoeng gij bya sang hunghwd geizyiemj neix, cungj beij mbouj ndaej aen bo iq neix caenciet, aenvih bo iq heuyauyau neix dwg dieg guhcaemz angqfaengz seiziq gou, de dwg ndaw ndaejgeiq gou ceiq angq, ceiq siengniemh haenx.

(haj nienzgaep Vangz Cinhanz)

Raemxda Gaggangj

Gou dwg naed raemxda ndeu, mwngz yaek cam gou dwg baenzlawz daeuj, neix gangj daeuj couh vah lai lo.

Miz baez ndeu, bouxcawj iq mwh cuengqhag ma ranz, youq gwnz loh deng laemx lo, naengnoh gaiqga deng lot, lij ok di lwed. Gou bonjlaiz youq ndaw ranz ndeindindi, sawqmwh mbouj rox deng byawz nyoengx mbat he, couh mbouj cengheiq daj gvaengzda bouxcawj iq lae okdaeuj lo.

Ndigah ha, gou cij youq mwh “cingzgvang gaenjgip” okyienh.

Laeglemx lwnh mwngz nyi, gou maj ndaej gyaue lai bw! Geubuh gou ronghcingx ndongqlik, ndang gou luenzlu raeuzrwd. Hwhw, gou yienghneix mwngz raen gyaue lwi?

Ranz gou vunz lai bw! Dahcej gou heuh “dahriu”, dwg raemxda angq, de dwg bouxcawj mwh angq riu okdaeuj; daegnuengx heuh “daegyau”, dwg raemxda siengsim, de dwg bouxcawj mwh gaujsi mbouj habgek lae okdaeuj. Gou ne, dwg raemxda indot!

Gangj daengz ndaw ranz, couh mbouj ndaej mbouj dwen daengz ndaek “yak” haeu cien nienz fanh daih haenx lo, de bonjlaiz dwg ndik raemxda manh ndeu, cix caeuq duzngozyiz doxyuk guhrwix, yaeuh vunz haih vunz, yak rwix guh caez! Daj neix hwnj cij miz coenz vah vunzlai ciengz gangj haenx—— raemxda duzngozyiz!

Neix couh dwg gou —— raemxda!

(seiq nienzgaep Banh Yinfeih)

